

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ei maa taoto iti â, ei faaeearaa iti â, ei tipae iti noa'tu â i te rima ei faaeearaa iti â! Maseli 6: 10.

Nu. 12.

Ditema, 1913.

Mat. 6.

Te Oroa a te Fatu.

I TE pô Sabati, ua taoto vau i nia i to'u tuaroi, e tae noa'tu i te aahiata i te poipoi; ua ara vau; ua faaoti i to'u pure-raa. I muri iho i te reira, ua feruri atura vau i te vea Katolika no te amuraa maa a te Fatu. Te na ô maira te tahi vahi i roto i taua vea ra e, “Teie râ, ua imi Iesu i te hoê ravea paari, ia ore te feia faaroo ia ri'ari'a i te amu i to'na tino, e i te inu i to'na toto. Ua na reira Iesu no to'na aroha rahi ia tatou nei. E teie taua ravea ra, maori râ e, ua huna oia i to'na tino i raro a'e i te hoahoa pane, ia tia i te taata ia farii ia'na, mai a'na i huna i to'na huru Atua i raro a'e i te huru taata.”

Te na ô maira teie nei vahi e, ua rave Iesu i te hoê ravea e huna i to'na tino e to'na toto i raro a'e i te hoahoa pane. E hoa ino ma e, o te tiaturi i te mau parau a Iesu i roto i te Bibilia, a faaroo mai. E e ite no to'na, a farii mai i ta Iesu i pahono i te haapiiraa a te mau Perepitero.

Te hohora nei au i te Buka fenua i teie nei poipoi, ei ite no'u i to'u purumu e tere ai au na nia i te moana, ia taa ia'u i te tuuraa maile, e tae atu ai au i te fenua i titauhia ra, mai

ta Iesu i haapii mai. Pahonoraa a Iesu i roto i te Mataio, pene 5: 15. Teie te taioraa: "E ore hoi te taata nei e tutui i te ramepa, a tuu ai i raro a'e i te farii; ei nia râ i te vairaa ra, ia maramarama to te fare atoa ra." Ua na ô faahou mai â oia: "E teie nei o tei fa'i ia'u i mua i te aro o te taata nei, e fa'i atoa vau ia'na i mua i te aro o tau Metua i te ao ra. O tei huna râ ia'u i mua i te aro o te taata nei, e huna atoa vau ia'na i mua i te aro o tau Metua i te ao ra." Mataio 10: 32, 33.

E teie nei, te ite nei tatou e, ua hinaaro te mau perepitero e huna i te tino e te toto o Iesu i raro a'e i te faraoa ama, oia hoi te hoahoa pane. Te faaite nei Iesu ia ratou, eiaha e tuu ia'na i raro i te iri, ei nia iho râ i te vairaa; eiaha atoa e huna ia'na na raro a'e i te pane. E ui atu tatou ia ratou, Na vai i papai i te Bibilia, e na vai i faahapa teie nei vea Katolika? Na te Momoni anei, i parau ai ratou e, ua hape te haapiiraa a te Momoni? Aore roa ia; o ratou râ tei farii i te mau parau atoa a te Atua i papaihia i roto i te Bibilia, o tei faaite ia i mua i te aro o te feia mana e, e haamana'oraa te oroa a te Fatu no to'na poheraa. O vai tei mârô atu? maori râ o te Bibilia te tahi pae, o te mau perepitero te tahi pae. Eaha te tumu i parau ai ratou e, tei roto Iesu i te hoahoa pane? No te mea ua ootihia e ratou te hoho'a o Iesu i nia i te hoê auri i hamanihia no te pane, ua tuuhia te auri i nia i te auahi, ia ama maitai te auri, ei reira te faraoa e tuuhia'i i nia iho. Ia iritihia mai te faraoa i amara, ua mau roa te hoho'a o Iesu i nia i taua faraoa i amara. No reira ua vare-roa-hia te mana'o o te feia maua i taua peu faufaa ore a te taata nei. Ua mana'o te feia maua e, o ratou i amu i taua pane, e te hoho'a atoa o Iesu i nia iho ra, e ora ia ratou. E teie nei ua maramarama roa ia tatou e, o te tumu mau ia i parau ai ratou e, ua rave Iesu i te hoê ravea e huna i te tino e te toto o Iesu i raro a'e i te hoahoa pane, ei parau ai hoi ratou e, ua amu-mau-hia te tino e toto o Iesu no teie nei mau vahi i faaitehia e au i nia nei.

Eaha ta Paulo parau i te Ekalesia i Korinetia. Ua na ô atura Paulo. "Ua amu ana'e outou i teie nei pane, e ua inu ana'e i teie nei au'a, ua faaite â ia outou i te pohe o te Fatu e tae noa mai oia ra." Korinetia I, 11: 26. Ua ite tatou e, ua taa ê ta Paulo i ta te mau perepitero Katolika haapiiraa. Te na ô mai nei Paulo, e faaiteraa i te pohe o te Fatu e tae noa mai oia. Nahea oia i te tae mai? no te mea ua pau i te amuhia e te haapaoraa Katolika te tino e te toto mau o Iesu. Ua taa ê anei ta te mau perepitero haapiiraa? E; ua hape roa. Te na ô maira ta ratou haapiiraa e, Ua amu-mau-hia; ua hunahia i raro a'e i te hoahoa pane. O teihea haapiiraa ta outou e farii? O ta Iesu anei e ta'na ra mau Aposetolo, e aore râ o ta te Pope e ta'na ra mau hoa? Eiaha roa ia, no te mea te na ô mai nei Iesu e, "O te mau i te parau ino ra, aore oia i hinaaro i te maramarama; e ore hoi oia e haere mai i te maramarama o te itea ta'na parau." Ioane 3: 20, 21. O vai teie, maori râ o te mau taata i parahi noa i roto i te mau haapiiraa hape, e tei ore i haapao i ta te Atua parau? O vai tei farii e tei haapao i ta te Atua mau parau, maori râ o Te Ekalesia a Iesu Mesia i te Feia Mo'a i te Mau Mahana Hopea Nei? Tei ia ratou te ite, te maramarama, te paari, te haehaa, te mārû, te aroha noa, te nounou ore, te feii ore, e te faaino ore i te taata. O te mau mea ia e hotu mai i roto i teie nei Ekalesia, o te tia ia ia parau e, e pîpî mau na Iesu.

E teie nei ua itea ia'u to'u purumu i teie nei poipoi; te hi'opoa ra vau i na pae e piti. Ua ite au e tano maitai au i te fenua; o to'u mau hoa râ, te taninito noa nei ratou i te moana; te imi noa nei te ravea e tano i nia i te fenua; aita râ e itea, no te mea ua faarue ratou i tei haapiihia mai. Ua rave noa i to ratou hinaaro aore e itea.

E te feia maua e, a tomo i roto i te ora e te haavare ore, ia paraihia to mata i te raau mata ia ite oe.

—Pahoa a Tahiaroa.

Te Parau Tuatapapa no Iosepha Semita.

(Tuatiraa.)

PENE XXXIX--XL.

Matahiti 1844.

Ua haere atura Iosepha e to'na ra mau taeae i Karatage. To ratou tapea-raa-hia. Te mau mea i tupu i Karatage. Te opuaraa ia taparahi i te Peropheta. Te mata'u rahi, e te ohipa haavare na Forada, tavana. Te mau tîtî i roto i te fare auri i Karatage. I haaatihia e te hoê pupu taata, o tei faahuru-ê-hia to ratou mau mata i te peni. Te taparahiraa. Te ho'iraa i Navu. Te hunaraa. Te hopea.

⑥ TE haamataraa ia to Iosepha ma haerea i Karatage no te hopea. Ua tae atura ratou i reira i te pô, e te tiaï noa ra te enemi ia ratou. Ua ani atura Forada, tavana, i te mau enemi ia haere maite atu i to ratou mau fare i taua pô ra, mai te parau atu e, ananahi i te poipoi e faaitehia te mau tîtî ia ratou ra. Parahi ihora Iosepha ma i roto i te hoê fare tapaeraa i taua pô ra, ei reira hoi te tahi mau taata taiva, o tei parau faaite mai e, ua opua-papu-hia te taparahiraa ia ratou.

I te poipoi roa, tuu ihora ratou ia ratou iho i roto i te rima no Betiwota, mutoi, ei reira haere atura ratou e farerei i te tavana rahi. I hapono atu na hoi oia i te tahi parau ia Iosepha ma, i mua'e i to ratou taeraa mai i Karatage, mai te parau atu e, e paruruhia ratou i te ino, e e haapaohia te hoê haavâraa tia. E oti a'era ta ratou parapauraa i te tavana, aratai atura oia ia ratou i mua i te pŭpŭ fa-hau e te mau enemi, e parau atura oia e, o teie hoi ia na Generala ra Iosepha raua o Haerama Semita. Taora noa'era te mau faehau Karatage i to ratou mau taupoo i nia, e unuhi ihora i ta ratou mau 'o'e, e pii maira ratou e, "E mea huru ê roa ia ta matou faaiteraa ia raua." Pahono atura Forada ia

ratou e, "E mâha roa to outou hinaaro."

E ho'i atura te mau taeae i te fare tapaeraa, ua farerei maira te mau raatira no te pūpū enemi ia Iosepha, e tohu atura oia ia ratou e, e tia hoi te tahi pae no ratou i mua i te mau pupuhi, e e ite ratou i te taheraa toto, e te mau mea ri'ari'a ia mâha roa'e to ratou hinaaro i te reira huru ohipa ino.

I te ahiahi no te mahana 25, afaihia'tura ratou i mua ia Robeta Semita, raatira no te mau faehau Karatage, e e enemi ino roa no te mau taeae. Ua faatiamâhia ratou ia aufau ratou i e hitu tausani, e pae hanere dara. I taua poipoi ihora râ i tapea-faahou-hia na Iosepha raua o Haeramu, e i te pô, haere maira te mutoi ma te hoê faaueraa ia afai atu ia raua i te fare auri. Aore roa ta raua mau haapii ture i faatia i te reira, no te mea aore roa ia i au i te ture. Ua parau maira râ Forada i te mutoi e, tei ia ratou te mau faehau Karatage, e haere oioi atura ratou, e aratô taue noa'tura ia Iosepha ma i te fare auri.

Ua pure noa te mau taeae i taua pô ra, e poipoi a'era, ua anihia te tavana ia haere mai i te fare auri, e ia tae maira oia, paraparau atura Iosepha ia'na, e ua parau maira o Forada e, mai tei au i to'na tura, e paruruhia ratou, e mai te mea e haere oia i Navu i te mahana i muri iho, e afai atu oia ia Iosepha i reira ra.

E haere atura o Forada, ua a'o noa'tura te mau taeae i te mau tia i no te fare auri, e ua mono-pinepine-hia ratou, no te mea aita ratou i hinaaro ia tauturu i taua ohipa ino roa ra. I te hora piti e te afa i te ahiahi, aore roa te taata faatere i te fare auri i faatia ia afaihia te mau taeae i te haavâraa, e parau faahou maira Forada ia rave i te mau faehau Karatage, e ua aratô-noa-hia te mau taeae i reira. Aita te haavâ ra o Robeta Semita i faatia ia haere mai te tahi mau ite no Navu, e ua faaroaroahia te haapaoraa i te haavâraa ia tae i te 29 no Tiunu, e toru mahana i muri iho.

Ia tae faahou atura Iosepha ma i te fare auri i taua pô

ra, taio ihora Haeramu i te Buka a Moromona; e faaite papu atura Iosepha i ta'na ite i te parau mau o te Evanelia i te mau tiaï, e i te pô roa, taoto ihora ratou. I muri iti a'era, parau omumu atura Iosepha ia Dana Ione e, "Ua mätä'u anei oe ia pohe?" Pahono maira Ione taeae e, "Te mana'o nei anei oe e, ua tae i te reira taime? I roto i te hoê ohipa mai teie te huru, e ere paha ia te pohe te mea ri'ari'a roa." Omumu faahou atura Iosepha ia'na e, "E ite hoi oe i te fenua ra i Wale, e e poro-haere atu i te Evanelia i reira ra." I te poipoi i muri iho, faarue atura Ione taeae i te fare auri, mai te imi i te tumu no te maniania rahi i roto i te pô, e parau maira o Farani Wolera, te hoê faehau Karatage ia'na e: "Ua peapea noa matou i te hopoiraa mai ia Iosepha Semita i te fare auri nei, e teie nei, e ore roa oia e faaorahia, e maori râ te hinaaro nei oe ia pohe atoa, e mea maitai ia faarue vave oe i teie nei vahi, no te mea e ore roa Iosepha, e aore râ to'na tuaana, e te mau taata i pihaiho ia'na, e ite faahou i te mairiraa o te mahana."

A haere atu ai Ione taeae, faaroo ihora oia e, ua opua papu te mau faehau Karatage, e te mau enemï, ia taparahi i te mau tîtï i taua mahana ihora. Ua haere haapeepee noa atura oia i te tavana, e ua iteahia e, i opua na hoi Forada ia haere i Navu, mai te afai atu i te mau faehau hau ê i te maitai, e mai te vaiho i te fare auri i roto i te rima no te mau enemï. Aore roa oia i faaroo i ta Ione mau parau, e aore oia i faatia ia faaorahia na Aposetolo ra Ioane Tela raua o Viliadi Ritedi, o tei roto atoa i te fare auri. Ua haere atura Ione taeae, e muri iti a'era, ua haere faahou mai oia, e o Cirusa H. Weloka, e o Ioane P. Gerene, e a'o atura ratou ia Forada ia haamana'o i ta'na parau ia Iosepha ma, a parau atu ai oia e, mai tei au i to'na tura, e paruruhia ratou, e eiaha ia vaiho ia ratou ia taparahi-noa-hia; ua mätä'u râ oia ia faaere i te enemï, e haere ê atura ratou. E tae atura ratou i Navu, haere atura i roto i te hiero, e haapararî ihora ratou i te tahi mau mea i reira; e ua faaroo-pinepine-hia te

mau taata toroa i te parau e, e pohe te Peropheta i taua mahana ra.

Ia faarue atura o Forada, tavana, i Karatage, i te poi-poi no te mahana 27 no Tiunu, mai te afai atu i te mau faehau maitatai, haapurara'tura oia i te mau faehau enemi i toe, maori râ te mau faehau Karatage, e vaiiho ihora ia ratou ia haapao i te fare auri. Ua faaineine e piti hanere no teie nei mau faehau i haapurarahia ia ratou iho, e haere maira ratou e taparahi ia Iosepha ma. Ua tuu ihora na taata e toovau, o tei haapao i te opani no te fare auri, i te mau ofai haavare i roto i ta ratou mau pupuhi, e tia i ihora i te mau taata i rapae.

Te ahoaho noa ra na tîti e maha, oia hoi, o Iosepha raua o Haeramu Semita, e o Ioane Tela, e o Viliadi Ritedi, i taua mahana rumaruma ra; ua himene râ Ioane Tela i te hoê himene nehenehe. I muri iti a'e i te hora pae i te ahiahi, ite ihora te mau taeae i te mau taata e rave rahi, o tei tapenihia, e i faahuru-ê-roa-hia to ratou mau mata, i te hororaa mai i te e'a no te fare auri. Ua pii maira te mau enemi i te mau tia i no te fare auri ia vî; faaroo ihora te mau taeae i te haruru no te tahi mau pupuhi, ei reira ua tae maira te enemi i te opani. Ua tuu atura te mau taeae i to ratou mau tino i te opani, mai te opani roa i te reira; e ua pupuhihia te hoê ofai pupuhitereumu i roto i te apoo taviri no te opani, mai te haaparari i te tapea. Ua ounu rii Haeramu i muri, e tano maira te hoê ofai pupuhi na roto roa i te opani i to'na mata, e i taua taime ihora, pupuhi-tano-hia maira na ofai e piti na roto mai i te haamaramarama i to'na tino. Ua mairi ihora oia mai te parau e, "E taata pohe roa ia vau."

Ua turai-iriti-noa-hia te opani, e tuuhia maira te mau pupuhi na roto. Te tupai noa ra Ioane raua o Viliadi i te mau pupuhi i ta raua na turutootoo, a pupuhi noa mai ai te enemi i roto i te piha; e te huru, e haamouhia ratou paatoa. Ua ou'a'tura Ioane Tela i te haamaramarama, area ua puta to'na humaha i te hoê ofai na te opani mai, e mairi ihora

oia i nia i te pae haamaramarama. Te pahee noa ra oia i rapae, a pupuhi tano mai ai to rapae i te hoê ofai i ta'na uati, i te huriraa mai i to'na tino i roto faahou i te piha. Ua haamata oia i te nee atu i raro a'e i te roi, e ua puta faahou ihora hoi to'na tino i na ofai e toru ra.

Ua ite Iosepha i te tino pohe no to'na tuaana i nia i te tahua, e ua ite atoa oia ia Ioane Tela i te taoto-noa-raa, mai te mea ra e, ua fatata roa oia i te pohe. Ua maitai râ o Viliadi Ritedi, e hinaaro ihora te Peropheta ia faaora ia'na, e no reira horo atura oia i te haamaramarama, mai te opua ia ou'a i rapae; i taua taime ihora râ, ua puta oia i na ofai pupuhi e piti na te opani mai, e i te hoê ofai na rapae mai. Ua parau atura oia e, "E te Fatu, tau Atua," ei reira mairi ihora oia i raro i te fenua, pohe roa ihora.

Ua horo atura te hoê taata Missouri taipoo ore ia'na, e faatia'tura i to'na tino i pihaiho i te tapo'i no te hoê apoo pape. Faaue atura o Levi Wiliama, raatira, i na taata e toomaha ia pupuhi, e pupuhi atura ratou i ta ratou mau ofai i roto i te tino no te Peropheta. Ua horo faahou atura te taata, tei faatia i to Iosepha tino i pihaiho i te tapo'i apoo pape, ma te hoê tipi i roto i to'na rima e tâpû ê atu i te upoo, ia noaa ia'na te utua moni i parauhia e te mau enemî i Missouri. I taua taime ihora râ, ite a'era ratou i te hoê mara-marama rahi mai te ra'i mai, e mairi ihora te tipi i te fenua, e riro ihora taua taata ra, e na taata e toomaha, e tei pupuhi atu ia Iosepha, mai te mea ra e, e ofai ia ratou. Ua meha-meha roa'era te mau enemî, e horo ê atura ratou paatoa; pii atura râ Wiliama ia ratou ia hopoi ê atu i to ratou na hoa e maha ra. E huri a'era ratou i teie nei na taata i roto i te hoê pereoo, hopoi ê atura.

Ua noaa ia Viliadi te hoê noa iho puta iti i to'na tari'a, e e tapo'i ihora oia ia Ioane Tela i te hoê roi mărû tahito, i roto i te tahi atu piha, haere atura oia i rapae e ite papu mai te mea ua pohe roa anei Iosepha, e aore râ aita. Ua ho'i maira oia i roto i te fare auri, e faaite maira i te parau

apî ri'ari'a ia Ioane Tela, Aposetolo. Ua faaineine o Ritedi i te na tino pohe no te Peropheta e te Patereareha, e e oti ihora oia i te utuutu atu ia Tela taeae, i te poipoi i muri iho, haere atura oia i Navu.

Ua farerei maira na tausani Feia Mo'a oto ia Viliadi Ritedi, e taua na tino pohe ra. Ua hopoihia'tura na tino pohe i te fare no Iosepha, e faaineinehia ihora no te hunaraa. Ua a'o atura o Ritedi, Aposetolo, raua o Setephano Makahama, i te Feia Mo'a i roto i te pureraa, e i te mahana i muri iho, ua iritihia te opani, e haere atura e hoê ahuru tausani Feia Mo'a i pihaiho i te tino pohe no na taata i taparahia no te faaroo e hi'o i to raua na mata. Ua haapaohia te hunaraa i te pô; ua tuuhia râ na pute one i roto i na afata, e ua hunahia ia te reira. I te tuiaraa pô, ua hopoi atura na taeae e hoê ahuru i na tino pohe, e huna omoe noa ihora i raro a'e i te niu no te Fare Navu; i muri a'era râ ua hunahia i te vahi hunaraa mau. Ua na reirahia ia ore te na tino pohe e haruhia e te enemi.

E o teie hoi ia te oraraa e te poheraa o te taata, o tei maitihia, a haamauhia'i te mau niu o te ao nei, ia tia i muri iho ia Iesu Mesia, te Fanau Tahî, i te raveraa i te ohipa faufaa rahi na te Atua i nia iho i teie nei ao. Ua rave ihora te Atua ia'na i to'na apîraa, e haapii maira ia'na i roto i Ta'na iho haapiiraa. E taata tahuti noa oia; auê râ te hanahana o to'na ra oraraa nei! Ua pohe ihora oia mai ta'na i ora na, ei hi'oraa maitai no te aroha mau. Ua horoa'tura oia i to'na iho ora no to'na ra mau hoa, e haamau ihora i ta'na ra parau faaiteraa ma to'na iho toto.—OLE PETESONA.

(TE HOPEA.)

“Teie ta'u parau, Ia aroha outou ia outou iho, mai ia'u e aroha'tu ia outou na.

“Ia horoa te taata i to'na iho ora no to'na ra mau taua, aita roa e taata aroha ê atu i tei reira.” Ioane 15: 12, 13.

Te Mau Parau Apî.

Ua faaroo noa Te Heheuraa Apî e, ua pohe te hoê ruau i Moorea, o Niu to'na i'oa, e ua vai noa to'na tino pohe i roto i to'na fare iti, mai te ore i itehia e to'na ra taata tupu i na mahana. Ia iteahia, ua pau te upoo e te arapoa i te amuhia i te mau urî.

Ua pohe a'enei o Tukua a Nuanua i te 22 no Atopa, 1913, i Takume. E tamahine oia na Nuanua e na te vahine ra na Teauahi, e ua baptizohia oia i roto i te Ekalesia a Iesu Mesia i te Feia Mo'a i te Mau Mahana Hopea Nei; riro atura oia ei tuahine itoito i te ohipa haapii e te faaararaa himene i roto i te Ekalesia, e tae noa'tu i to'na poheraa. Ua tupu mai to'na ma'i haaparuparu i to'na mau melo mai Marutea mai. Ua faaoromai maite oia i to'na mau iui i na avae e piti, i tae noa mai ai oia i Takume, i te 22 no Atopa, i pohe ai oia, e ua hunahia oia i pihaiho ia Pou a Nuanua, i te 23 no Atopa, 1913.

Ua pohe a'enei te peresideni no te fenua ra o Hayti, e ua haapaohia te hoê pureraa no to'na hunaraa i roto i te hoê fare pure rahi i taua fenua ra. Ua hunahia oia ma te tura rahi o te hau, e ua î roa te fare pure i te feia toroa e te faehau no te hau; e ua tia noa e 12 faehau i pihaiho i te afata tino. Ia huru oti te pureraa, ua faaue mai te raatira no te faehau i te hoê faaueraa, e ua pupuhi tia'tu taua mau faehau e 12 ra i te afata tino, ei reira ua tia i nia te tahi pūpū faehau, e ua pupuhi ratou i te aroaro no te fare pure, ei tapao no to ratou aroha i te taata i pohe ra. Ua parauhia e, te tumu i pupuhihia'i te afata tino, ia papu roa e, ua pohe roa te peresideni. E peu huru ê roa teie, te pupuhiraa i te feia pohe roa, e ia ravehia te reira i roto i te fare pureraa.

I te fenua ra i Italia, te ora noa ra te hoê taata, o Giuseppe Pauce to'na i'oa, o tei hau i te nainai i te mau feia paari atoa o te ao nei. Mai tera te huru o taua taata ihipiro ra, e piti ahuru e ma toru initi oia i te teitei; to'na faito e hoê ahuru e ma hitu paunu ia, e ua tae oia i te piti ahuru e ma vau o to'na ra matahiti. E mea afaro maitai to'na tino i te tupuraa, e e taata maramarama hoi oia.

I te 17 no Atopa, ua tupu te hoê ati ino rahi roa i te fenua ra i Purutia. A tamata'i te mau faehau a te hau i te hoê pahi reva opupu apî roa, o Zepplin "L 11", ua roohia ratou i te pohe. Ua faaîhia te opupu i te mata'i (gas), e ua pee i nia te pahi, ei reira ua faaterehia te mau matini, e ua tere te pahi; aita râ i roaa te hoê afa o te kilometera, e ua haruru mai te vairaa o te mori uira; pararî roa ihora te pahi taatoa, e ua mairi mai i raro, mai te hoê ofai te huru. Ua pohe roa ana'e te mau taata, o tei tere i nia iho ia'na, maori râ te hoê noa taata, tei ora mai, e ua haamatapô-roa-hia o'na.

E peapea rahi roa i ò atu Niu Zilani ma, oia hoi, ua faaea te mau mataro rave ohipa i nia i te mau pahi, e i nia i te mau uahu; e aita rea te taata rave ohipa i teie nei. Aita i taa papu roa te tumu no te peapea, maoti râ e, ua inoino atu te feia rave ohipa i te mau ona; e ua titau hoi te feia rave ohipa i te moni rahi a'e rii, e aita hoi i roaa mai. I roto i te mahana hoê, tutaupia e 27 pahi auahi i te oire ra i Wellington, e aita hoi e ravea ia huri i uta to ratou taehaa. Ua tamata te tahi mau pahi e huri i to ratou taehaa i uta, e ua tama'i puai mai te mau taata faaea ohipa i te mau mataro i nia i taua mau pahi ra. No te peapea rahi, ua tarahu te hau i na hanere mutoi e paruru i te mau taata e hinaaro i te rave i te ohipa. O te tumu teie i maoro ai to tatou pahi hopea no Niu Zilani mai, oia hoi o Moana. Te mau mataro tumu no taua pahi ra, ua monohia ia e te tahi mau taata faaapu.

I Beritane, ua faahoro te hoê taata i ta'na pereoo uira e 110 maile i roto i te hora hoê; ei te mahana i muri iho, i taua taime ra, ua roaa e 50 maile i roto i e 28 minute; ei reira i hora i pararî ai te tahi uaua i muri, e ua tahuri te pereoo e toru a'e taime. Pêpê ino roa te upoo o taua taata ra, e ua pohe roa.

Te parau apî hopea roa no Amerika mai: ua faaineine te hau Amerika e tama'i atu ia Mexico, te fenua i tapiri mai i te pae apatoa i te hau Amerika. E taime maoro roa i teie nei te faaoromairaa o te hau Amerika i te mau ohipa iino no Mexico. E fenua peapea rahi roa o Mexico, e ua orurehau noa to'na mau taata i te mau taime atoa, mai te taparahi te tahi i te tahi; e ua taparahi ratou i te tahi mau taata Amerika; e ua tiahi atu i te tahi pae; e ua haruhia te faufaa na taua mau taata ra.

Ua tupu te hoê ati ino rahi roa i Beritane, i te avae ra Atopa. Ua rave noa e 935 taata i te ohipa i raro a'e i te fenua, oia hoi i roto i te hoê ôraa arahu. I te 16 no Atopa, a rave ai taua mau taata ra i te ohipa, ua haruru te hoê baero o te paura, e ua hanere te taata i pohe roa. E 532 taata i ora, e e 403 taata i pohe roa. I muri iho i te harururaa o taua paura ra, ua i roa taua ôraa arahu i te auahi, e te auauahi, aita hoi e ravea ia roa te mau taata i haaparuparuhia. Na roto i te itoitō rahi, ua roaa mai no roto mai i te apoo e 111 tino pohe, e te toea o te mau tino, e riro paha, ua pau i te auahi. I roto i te hoê utuafare, ua pohe te metua; e e toovau tamaroa. Ua toe mai e 205 vahine ivi, e e 309 otare.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.